

# WANTOK GO NAU LONG 2045 SKUL

Liklik meri long poto daunbilo i hepi nau bikos samting olsem 90 tausen man meri pikini-ni bilong Papua Nu Gini bai lukim pes bilong en.

WANTOK niuspepa i go nau long moa olsem 8500

pipel na i gat moa olsem 10-pela man i save ritim wanpela wanpela pepa.

Long laik bilong Edukesen Dipatmen WANTOK niuspepa nau i go long olgeta 2045 skul bilong

Papua Nu Gini.

Inap nau POST COURIER i bin go; nau WANTOK i wankain long en.

Nesenel Edukesen Bot na Minista Bilong Edukesen, Mista Ebia Olewale, i tok orait long

dispela samting.

Dipatmen hia i bin tok, WANTOK na POST COURIER, tupela wantaim bai go long olgeta skul inap long mun Jun na gavman i baim.

Bihain, edukesen dipatmen i tok, wanpela wanpela skul i mas tok em i laikim wanem niuspepa: WANTOK o POST COURIER...o em i laikim tupela wantaim.

Tasol bigin long mun Julai bai skul yet i mas lusim sampela mani long baim niuspepa em i laikim.

Edukesen Dipatmen i no laik bai ol skul i kisim nating. Sapos dipatmen yet i mas baim tupela niuspepa hia inap long 10-pela mun bilong skulyia, em i mas lusim samting olsem \$4000 bilong baim WANTOK na samting olsem \$35,000 bilong baim POST COURIER.



## HEPI ISTA

### LUKIM INSAIT

- Pas bilong Ista: 3
- Ol i winim mani: 7
- Haiwara yet: 8,9
- Tok long graun: 13
- Stori tumbuna: 4
- Anzac De: 14
- Save long memba: 12
- Yu tu inap win: 16

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prininem bilong yu tru, orait yu raitim wanpela narapela nem bilong yu.

## MERI DAUNIM MARASIN

Dia Edita.- Mi laik givim sampela tingting bilong mi long stretim wari bilong Mista G. Marasin Paite bilong Yamiyufa, long Westen Hailans Distrik.

Yes, mi wanpela meri husat i bin kirap nogut long tok yu bin mekim long ol kanaka meri bilong mipela maritim ol waitskin man.

Marasin! Yu lus tru long ol meri kanaka, a? Yu ating i wanpela lusman stret long ples bilong yu yet. Na sapos mi man olsem yu bai mi sem pipia stret long mi yet na i no inap tru long raitim pas bilong planti ai bilong ritim. Nogat tru!

Kanaka meri i no maritim waitskin man bikos em pulim soks na putim hanwas. Kanaka meri i no maritim em bikos em i gat planti mani, o sapos tupela i marit, meri mas go stap long Australia. Nogat! Sapos kanaka meri i maritim waitskin em samting bilong tupela,

laik bilong tupela i tok. I no samting bilong mipela ol pes nogut, na ol rabisman long toktok long ol.

Yu tok tu olsem, yu no save harim wanpela meri kanaka maritim waitskin na go stap long Australia. Ah! Ah! Mi lap long yu. Yu stap long maunten na tupela ai i no op gut tru yet a? Mipela i gat kanaka meri long Australia, long New Zealand, long Holland na arapela waitskin kantri tu. Yu bilong ol maunten na yet yu no save long wanpela maunten meri i go stap long Holland wantaim man na pikinini bilong em.

Las tru mi laik tokim yu stret. Mipela ol meri i no save lus tru long ol man olsem yu! Tasol i luk olsem yu yet i lus tru long mipela ol meri. Ol meri yupela i ting olsem wanem long dispela man?

Em tasol.

Theresa E. Iriki  
Bogia/Madang.

## NO GRISIM OL PIPEL

Dia Edita.- Mi laik bekim tok bilong Nisbet bilong Bogia.

Mi lukim hia long Goroka tu i gat planti kain misin.

Olgeta taim long Sarere long maket, ol i raitim planti kain tok gris bilong ol, na givim ol man na ol i tok, yu i kam long lain bilong mipela.

Em i no tru, mi ting ol i gris tasol.

Ol i laik putim ol

man i go insait long rot nogut tru.

Ol Katolik na Lutheran i soim nambawan pasin long ol pipel. Tasol ol dispela giaman misin ol i no save opim ai na lukluk. Ol i slip tasol na driman nabaut na grisim ol man.

Katolik na Lutheran i helpim pipel moa moa yet, long kirapim skul na etpos.

Otto Suarke,  
Kamaliki/E.H.D.

## MISIN TOK BILAS

Dia Edita.- Mi laik autim wari bilong mi i go long Wantok Nius. Mi wanpela katekis, long dispela ples i gat ol kain kain misin i stap. Na mi harim sampela misin i save tok bilas long ol arapela misin.

Ol i bin tok olsem. Yupela katolik lotu, yupela opim ai na lotu. Bihain yupela indai, bai yupela pasim ai tasol i go long paia stret. Na mipela pasim ai na lo-


ting bilong ol pipel, bambai ol kantri bilong yumi bai i bagarap.

Dispela kain tok olsem mi no painim long buk Baibel. Mi ting i no i stap long buk Baibel.

Tasol husat yu lukim dispela tok olsem i stap long buk Baibel. Orait yu raitim tasol i go long Wantok Niuspepa. Bambai mi lukim na mi ken bilip tru.

Em tasol wari bilong mi.

Pius Ekruai,  
Nipa Sap Distrik.



## GOD TRIWAN SOIM PINIS

Dia Edita.- Dispela tok mi lukim i kam long nius pepa Wantok 7 Februari 1973. Brata G.M. Nisbet long Bogia-Madang i raitim na mi laik bekim sampela tok olsem.

Yes brata Nisbet, yu tok long husat makim bisop: olsem na mi laik kiliaim na yu putim ia na harim. Olgeta deliget bilong 6-pela distrik bilong Elcong makim bisop long taim bilong sinod.

Namba wan taim tok bilong bisop i go long olgeta distrik bilong Elcong. Ol i putim insait long ol bung bilong ol seket na skelim ol tingting long olgeta man long ol arapela distrik. Tu long nem Elcong, so long seket yet i makim 2 o 3-pela nem.

Namba tu dispela olgeta nem bungim na wanpela komiti i skelim lusim sampela nem na i kisim 2 o 3 nem tasol long kamap long bikpela ileksen.

Namba tri taim nau ileksen i kamap na ol-

tu. Bihain mipela indai, mipela opim ai tasol i go long heaven stret.

Ol arapela i lukim ol sampela lotu katolik ol i bin sori nogut tru. Bikos ol i ting katolik i wok long paia tasol.

Tasol mi ting yumi olgeta misin. Yumi bringim Gutnius bilong Jisas Kraist tasol, yumi save God wanpela tasol i gat pawa tru bilong kotim man o bringim man long heaven.

Plis ol brata mi ting tok bilas i no gutpela pasin tru. Yumi olgeta misin i wokman bilong God tasol. Plis mi laik yumi bung wantaim na wok stret. Yumi ol misin i no ken paulim tingting bilong ol pipel. Sapos yumi paulim tingting bilong ol pipel. Sapos yumi paulim ting-

geta deliget soim aut laik bilong ol. Nau kaunim vot na arapela arapela man i lus na em i kamap bisop.

Mi laik soim yu olsem i gat 200 deliget i stap na ol i vot na 140 winim namba 60, na yu mekim 61 tu i lus. Em tasol as bilong makim bisop.

Brata Nisbet yu tok long yumi wetim long God Papa bai i soim man long kamap bisop. Em, God Triwan soim pinis, na yu laikim wanem moa?

Yu laik Jisas kamdaun moa soim bisop long yumi o wanpela angelo i kam tokaut long nem bilong man kamap bisop? Ating ol i abrusim yu long kamap bisop na yu gat dispela tok.

Sori brata Nisbet Jisas i kamdaun pinis na em i putim Gutnius na rot bilong sios i stap klia tru. Mipela i no inap kranki long en.


Baibel i stap long han bilong yumi. Bihainim tasol em i rot bilong wok bilong sios.

Maya Michael,  
T.A.A.- Lae-Taun.

## WATPO ABRUSIM?

Dia Edita.- Mi laik autim liklik wari bilong mi. Mi harim sampela kuskus bilong Lokal Gavman Kaunsil, ol i save kaikaim hap mani bilong Lokal Gavman Kaunsil Beng. Na taim ol i painimaut, ol i no kotim em strong na ol kiap i no putim em long kalabus samting. Ol i save salim em long narapela distrik o patrol pos.

Mi ting dispela pasin bilong salim long narapela hap em i no stret. Bilong wanem? Dispela man i no inap pinisim mani bilong ol narapela



kaunsila. Mi ting mobeta ol kiap i kotim dispela kuskus i mekim rong long Beng na putim em long kalabus tu em i gutpela. Bilong wanem em i ken pilim.

Na bihain i no inap mekim olsem long wok kuskus long Kaunsil Beng. Dispela pasin bilong man i westim mani na mekim rong ol kiap i salim em long narapela hap. Em mipela tingting planti tru.

Ating ol i wari long save bilong em na ol i no kotim em o ating ol i hatwok long painim nupela man long kisim ples? Mipela pipel i tingting planti na mi raitim dispela leta.

Sapos wanpela man o meri yu laik bekim kranki tok bilong mi na kranki tingting bilong mi, orait rait i go long Wantok na em i ken prinim.

Paul Kem,  
Erave/S.H.D.

## INDEPENDENS I MAS WET

Dia Edita.- Nau mi laik autim wari bilong mi.

Yumi save olsem gavman bilong Australia i laik givim independens long 1974. Mi ting em i no gutpela tru, bikos yumi no save yet long wok bilong selp gavman.

Na gavman bilong Australia i hariap tumas long givim independens long Papua Nu Gini.

Mi ting em i samting bilong olgeta pipel bi-

long Papua Nu Gini yet i ken askim long dispela samting.

Mi ting bihain long independens em i ken i gat pait long Papua Nu Gini.

Mi save harim long ol nius long redio, oltaim long Sauten Hailans na Westen Hailans i gat pait.

Em i laik bilong Papua Nu Gini long makim de bilong kisim independens.

Jack O. Sanive,  
Bougainville.

## HAILANS I NO REDI YET

Dia Edita.- Mi laik autim liklik wari bilong mi. Taim mi harim selp gavman i kamap long 1973, em gutpela.

Tasol mi harim independens i kamap long 1974. Mi tingting planti, long wanem mipela ol pipel bilong Hailans i hatwok long kisim save long olkain samting bilong ol waitman.

Plis yupela tingting liklik, no hariap tumas yu mas ting, ol Hailans pipel i no redi yet.

Plis mipela i tokim ol pipel na ol i tok, yupela i tok long ol tumbuna bilong yumi i dai pinis na ol i kirap na i kam bek gen o yupela i tok wanem?

Ol i no klia yet long selp gavman na independens.

Plis namba wan Minista yu mas tingting long Hailans Pipel.

Ludwig Michael T.  
Erave/S.H.D.

## YU TING WANEM LONG DISPELA TOK ?

Na long namba wan de bilong wik, long moning-taim tru, ol i go long matmat. Ol i kisim dispela wel samting i gat gutpela smel, pastaim ol i redim pinis, na ol i karim i go. Na ol i lukim ston ol i bin tantanim i go na i no i stap moa long maus bilong matmat. Na ol i go insait, tasol ol i no lukim bodi bilong Bikipela Jisas. Ol i tingting planti long dispela, na ol i longlong i stap, na ol i lukim tupela man i sanap klostu, klos bilong tupela em i lait tumas. Ol meri ol i pret na ol i daunim pes na i lukluk long graun. Tasol dispela tupela man i tokim ol i spik, "Bilong wanem yupela i laik painim man i gat laip long ples bilong ol daiman? Em i no i stap hia. Em i kirap pinis! Yupela i mas tingim gen dispela tok em i givim yupela, taim em i stap yet long Galili. Em i tokim yupela long ol i mas givim Pikinini Bilong Man long han bilong ol man bilong sin, na ol i mas nilim em long diwai kros. Na long namba tri de bai em i kirap bek gen."

Na ol i tingim dispela tok Jisas i mekim bipo, na ol i lusim matmat na ol i go bek. Na ol i tokim ol 11-pela disaipel na olgeta arapela man tu long dispela olgeta samting. Maria bilong Magdala, na Joana, na Maria, mama bilong Jems, dispela ol meri ol i stap. Ol dispela meri na ol arapela meri i stap wantaim ol, ol i givim dispela tok long ol aposel. Tasol ol aposel ol i ting ol meri i mekim tok win nating. Na ol i no bilipim tok bilong ol. Tasol Pita i kirap na i ran i go long matmat. Na em i lindaun na i lukluk insait, na em i lukim ol laplap tasol i stap. Orait em i go bek long haus na em i tingting planti long dispela samting i kamap.

MI LUK MI RAITIM



## Komisin Bilong Graun Kibung Gen

Poto long raithan i soim komisin bilong harim ol tok bilong graun i kibung long Hiri Haus Kaunsil. Long raithan yu lukim siaman, Mista Sinake Goava, wantaim Mista Gaun Henao presiden bilong Hiri Kaunsil. Ol i harim nau ol pipel bilong Port Moresby i tokaut long ol wari na trabel bilong graun.

Komisin i kamap long Duke ov York Ailan. Ol pipel i tok, wan wan bisnisman i ranim nau plantesin i mas givim bek long ol pipel. Komisin i askim Mista Tokoro, sapos ol pipel i kisim bek graun, bai ol i mekim wanem long en? Em i bekim tok, ol pipel bai i mekim wok kopratif na winmani bai ol i yusim long kirapim ol skul na ol arapela wok bilong ples.

Baining. Ol graun i stap nating i bilong olgeta Baining pipel, na i no bilong wanpela man tasol.


Sapos wanpela man i kiliaim wanpela hap bus na planim kokonas na kakao em i ken tok, em i hap graun bilong em. Tasol ol Baining i no laik salim graun long ol Tolai. Orait, graun ol Tolai i baim pinis i mas kam bek long ol Baining.

Kokopo. Mista Tokaika i laikim man i makim Mataungan Asosiesen, Warbete Kibung na Toma Kaunsil, ol i mas stap long dispela komiti bilong graun.

Mista Blasius Tirupia i tok, gavman na misin na ol bisnisman long hap bilong Kokopo i mas givim bek ol graun long ol pipel.

Gazelle. Mista Blasius Tirupia i tok, ol trabel bilong graun bilong gavman bilong bipo, ol i mas stretim nau.

Hanuabada Viles. Mista Huta i tokim komisin olsem, komiti i mas i gat ol bikman long ples tu i toktok long olkain trabel bilong graun. Em i tok, wanpela trabel olsem, komisin i save kisim wanpela lain pipel tasol na toktok long ol wari bilong graun. Em i no stret.



## Mipela helpim kantri asde tude tumora

Ol balus bilong mipela i save flai moa long 200 taim long wik.

Mipela i gat sampela pailot i bin draivim balus inap 18,000 aua.

Mipela save flai i go long 40 ples balus insait long olgeta hap bilong Papua Nu Gini.

Olsem tasol, mipela i pilim mipela i save moa long flai long Papua Nu Gini.

Na wanem, em i ples tru bilong mipela Ansett.




Serving the country-yesterday, today & tomorrow



**ANSETT AIRLINES OF PAPUA NEW GUINEA**  
in conjunction with ANSETT AIRLINES OF AUSTRALIA

AP112

# OLGETA HARIM GUT!



Dispela sop pauda, ol i kolim "COLD POWER" i nambawan tru. Em i wasim na rausim tru ol kainkain pipia long ol klos bilong yu.

Dispela sop pauda i gat wanpela kain strongpela marasin long en i save mekim save tru long rausim ol kain pipia – long ol klos.

Yu ken usim wara long tang or long wara nating. Dispela i kol wara. Sop "COLD POWER" i strong moa na i ken rausim ol pipia long klos bilong yu.

# PLANTI LOKAL EDUKESAN OFISA KAMAP NAU



Long poto daunbilo (kirap long lephan) yumi ken lukim: MISTA MANLY DAVID, MISTA DAVID WOIWOI na MISTA TAMEAN TOPAURIA.

Tripela i tisa long ol teknikal skul na i bin kam bek long lukluk raun long ol teknikal skul long India na Malaya na Singapore.

Mista David i bilong Moramora Vokesenel Senta, Mista Woiwoi bilong Kandrian na Mista Topauria bilong Malaguna Teknikal Koles.




MISTA PAT ILA'AVA i bosim dipatmen bilong tilim ol buk na samting i go long ol praimer skul.

Bipo em i tis long Madang na i kamap inspekta bilong ol skul. Long 1970 em i Edukesen ofisa bilong S.H.D.

MISTA GENO ROAKEINA i kisim ples nau bilong Mista Peisker, em i namba tu dairekta bilong ol praimer skul.

Mista Roakeina i bilong Sentral Distrik na em i bin tis long Wewak na Mt. Hagen na Balimo na Daru.




MISTA KWAMALA KALO i holim ples nau bilong namba tu dairekta bilong ol teknikal skul.

Em i bin stat long tis long yia 1949 na i bin tis planti yia moa.

Em i go long Yunaitet Nesens olsem maus bilong Papua Nu Gini long yia 1963.

(Thanks to D.I.E.S. for all pictures)



MISTA KINI VEOLI em i ofisa i save bosim olgeta 18 Distrik Edukesen Ofis wantaim olgeta manmeri i wok insait long ol. Em i bosim tu ol lain i bosim sampela tisa koles na teknikal koles na bikpela skul.

Dipatmen bilong em i yusim moa lokal pipel.

Em hia:

**Mista Nelson P. Aingras**

Em hia:

Maski wasket bilong yu i gat gras ain o gras mosong. Yu sev tasol wantaim **BLUPELA GILLETTE KAPARESA**, na olgeta de skin bilong pes bilong yu i bai kamap malumalu tru - Em kain pes hia ol meri i laikim moa moa yet

**BLUPELA GILLETTE KAPARESA**

Wanpela wanpela paus i gat 5 pela kaparesa i strong moa na i sap tumas ...

(o Mista Mosong)

## TIMBA BISNIS

Long taun bilong Konos, insait long Nu Ailan Distrik, wanpela asosiesen bilong ol fama i mekim bisnis bilong wokim ol timba nau.

Asosiesen i yusim \$200,000 (tausen) dola olgeta long kirapim dispela bisnis.

Ol timba ol i save salim i go long kantri bilong Japan tasol.

Asosiesen hia i bin stat long yia 1969. I kam inap nau, i gat 1,500 memba olgeta i wok long en.

Ol profit o win mani bilong dispela asosiesen bai ol i yusim long stretim sindaun bilong ol viles pipel.

## NO GAT HANGRE MOA

Gavman bilong Papua Nu Gini i tok olsem em i no inap long salim kaikai i go long ol hangre pipel moa, long wanem, ol gaden kaikai bilong ol pipel long hap bilong Westen na Sauten Hailans Distrik, ol i kamap gut nau.

Gavman i tok em i bin salim moa kaikai i go long dispela 2-pela distrik, na nau ol pipel i kisim inap kaikai na tasol i gat sampela bek rais na sampela kes tin pis i stap nating.

Gavman bai salim ol

### OL I WINIM MANI :

Miss Cathy Moroi  
Bougainville

-----  
Afa Sinki  
Kudjip, Banz

-----  
Pakanba Kaipuk  
Ambunti, E.S.D.

-----  
Daniel Donny Pangea  
Ogelbeng, Mt. Hagen

-----  
Lucia Kaiwar  
Ningil, W.S.D.

-----  
Lukim las pes; yu tu  
yu inap win. Traim.

dispela lep kaikai long ol pipel bilong Papua Nu Gini long liklik prais tasol.

Sampela kaikai moa, bai Gavman i salim long sampela oganaisesen olsem; misin, ol bisnis kampani, ol bisnisan, na ol stuakipa.

## takis long ol pilai

Ol pipel i stap long 2-pela siti bilong Papua Nu Gini em long; Lae na Port Moresby, bai ol i peim sampela takis long go lukim ol kain kain pilai insait long siti olsem, so, muvi, pilai, na spot.

Em hia mak bilong takis ol pipel bai peim.

Sapos ol pipel i peim 50 sen takis, 5 sen bai i go long dispela takis. Ol pipel i peim 51 sen i go inap long \$1 dola, bai ol i kisim 10 sen long dispela takis gen. Na sapos ol pipel i peim antap long \$1 dola, bai ol i rausim 20 sen i go long dispela takis.

## 19 meri kos gen

Long Ahioma, 19 meri bilong Sauten Hailans, Simbu, Nu Ailan, na Milne Bay Distrik, ol i mekim wan yia trening long kamap welfe asisten bilong Kaunsila. Long 1972, 13 ol i kamap welfe asisten.

## NASARIN MISIN

Long mun. Mas 17 de, Nasarin Misin long Westen Hailans i opim Baibel Skul long viles Ningei long Mt. Hagen.

Inap samting olsem 1,500 manmeri bilong dispela kongrigesen bilong Nasarin Sios i bung long dispela taim.

Ol i mekim bikpela kaikai na lotu bilong opim dispela skul.

Wanpela hetman bilong sios long Amerika em i kam bilong opim dispela skul. Nem bilong em Dokta V.H. Lewis.

Ol kongrigesen bilong Nasarin Sios i bin


bringim wanpela ston bilong sios bilong ol na ol i putim long simen arere long nem bilong skul. Ol i mekim long soim ol i olsem han bilong helpim wok bilong Baibel Skul na helpim wok bilong God i go het.

Nasarin Sios i bin kirapim Baibel Skul bilong ol long yia 1964. Nau sumatin i kamap planti na graun i sot na ol i kam long nupela ples.

Dispela yia i gat 30 sumatin i stap na 9-pela long ol i sumatin meri na ol i stap long klas bilong ol meri.



Kirap long lephan bilong poto, Mista Lee Eby, het tisa bilong Baibel Skul; Mista Wallace White hetman bilong Nasarin Sios long Nu Gini; Dokta V H. Lewis, hetman bilong Nasarin Sios long Amerika. Ol i sanap raun long ol ston bilong nupela skul.



OL BRATA BILONG SANTU HAT BILONG JISAS

## YANGPELA MAN, HARIM

Mipela mekim planti kain wok: tisa, dokta, didiman, mekanik, katekis, kamda, sosal wok, helpim ol yangpela pipel na kalabusman.

Tupela kain memba:

1.) Brata tru

2.) Asisten Brata

Yu rait i go long:

PATER LIEBERT

KATOLIK MISIN, WEWAK




Poto antap i soim hap Sepik antap long hap bilong Chambri Lakes. Tasol ol raunwara hia, i no raunwara bilong Chambri, nogat. Em Sepik tasol. Long planti ples moa long hap bilong Ambunti inap long Angoram i olsem tasol. Planti ples moa i luk olsem inap tripela mun nau. Na bihain ol wara i go daun, wataim bai ol meri inap wokim ol gaden gen?

Em hia ol skulboi i swim nabaut long stesin Kapaimari. Yu ken swim i go long haus lotu hia. Long gutpela taim dispela haus lotu i gat longpela leta i go antap. Nau yu lukim. Long wanpela ples 150 kanu pulap long ol manmeri i kam long lotu long Sande.



# Wara Sepik No Slek


Haiwara i daunin planti ples inap tripela mun pinis. Na em i go antap yet; em i no slek liklik. Olgeta gaden i lus pinis.



Long lephan sampela meri i bung long maket long Kapaimari. Bihain yu ken lukim ol bris bilong wokabaut sapos yu no gat kanu.

Daunbilo long lephan em skul long Ambunti. Taim ol i wokim ol skul ol i bin kisim mak bilong haiwara bilong 1966. Tasol nau wara inap long tu fit i stap insait long ol skul.

Doti wara i stap nabaut long olgeta hap; doti wara i bilong dring tu. Antap ol skulmanki i go long skul. Yu lukim rup bilong haus kuk long raithan antap na long poto daunbilo ol bun bilong en...wara i bin kamap inap long rup olgeta. Bai ol i kukim kaikai we? Sampela pipel i bin wokim nupela plua long haus tupela taim pinis; oltaim i go antap moa.






# 76 TRENI KAMAP WODA OFISA

Dispela poto long raithan i soim ol 76 ofisa bilong Woda Plis, em i no longtaim i go pinis, ol i bin pinisim 6-pela mun trening bilong ol long Bomana Korektiv Institusene Training Senta, long Port Moresby.

Long dispela taim, Minista bilong ol Plis na Woda, Dokta John Guise em i go pas long bikpela mas bilong ol ofisa hia na givim namba i go long ol. Long tok inglis, ol i kolim dispela bikpela mas long; (Passing Out Parade).

Dokta John Guise i bin amamas tru long lukim planti yangpela man bilong Papua Nu Gini i kamap ofisa nau long dispela taim. Yu ken lukim Dokta Guise i wokabaut wantaim 3-pela Woda Ofisa.



WATCH THIS, SCAMP!

Lukim mi. Mi spit moa. Mi lukim yu.

**DOK MASKI**

YIPPEE!

© 1969 Walt Disney Productions World Rights Reserved

Olaboi! Em i go antap na kalap kalap nabaut.

HOW ABOUT THOSE ACROBATICS!

Mi moa yet, man i save danis wantaim rop i no inap long mi. Mi win.

GOSH! HOW COME YOU DON'T GET DIZZY?

Distributed by King Features Syndicate. 8-6

O, ai bilong mi i raun. Na olsem wanem ai bilong yu i no raun?

OLGETA DE OLGETA MANMERE I MAS WASWAS WANTAIM SMELSOP, NEM BILONG EM LUX.

WASIM PES BILONG YU LONG LUX. PILIM NAU EM I KAMAP KLIN TRU.


TAIM YU WASWAS, YU YUSIM LUX TASOL. OLABOI, NAU YU PILIM KLIN TRU. SKIN I LAIT MOA.

SANDA BILONG SMELSOP LUX I PAS I STAP LONG BODI BILONG YU NAU.

LUX EM I NAMBA WAN SOP BILONG WASIM OL PIKININI TU.

SAPOS YU LAIKIM BODI I STAP KLIN NA I GAT GUTPELA SMEL, YU WASWAS LONG SMELSOP LUX TASOL. YU GO, BAIM LUX TUDE.

EZ1085



### **Ol Soldia Man Bilong Pait**

Ol 6-pela man i win long boksen long Papua Nu Gini. Ol i kisim namba long boksen.

Ol dispela soldia i stap long 1 P.I.R. long Port Moresby. Ol soldia i sanap wantaim Saiden Ted Orreal bilong Stafford, long Australia. Saiden Ted Orreal i stap long hetkota bilong ol ami long Port Moresby. Em yet i skulim ol.

Kirap long lephan, Kopul Ronbinson Segari (LPIR) Larry Dick (PNG woksap) Saiden Orreal, Stephen Kaintang (LPIR) Saiden Luke Goa (PNG Odians Depot) Kopul Jack Eki (LPIR) Stephen Meta (LPIR) na man i win moa long boksen Mista C. Titi i no stap.




### **FILM DIREKTA KAMAP MEMBA**

Mista Sabbath i kam long Misima viles long Milne Bay Distrik. Em i wanpela film direkta bilong Dipatmen bilong Nius na Toksave. Nau em i kamap memba bilong wanpela sosaiti ol i kolim long tok inglis, Cinemaphotographer's Society. Ol i bin makim em memba, long taim em i bin mekim stadi bilong em long olkain wok bilong film, long Kinelab Film Pty Ltd., long Sydney.

Kos hia i stat long 15 Februeri na pinis long 31 Mas 1973. Mista Sabbath i lainim planti moa wok bilong wasim olkain film na rekotim musik bilong muvi film long soim ol pipel.

Yu no gat lektrik?  
Maski, samting nating.  
Kisim tasol dispela lam  
kerasin: PETROMAX. Em i  
win tru, i lait olsem  
san.




ORIGINAL  
**Petromax**  
MADE IN GERMANY




**TOYO**

TOYO taia i  
nambawan tru  
bilong olkain  
ka, trak, bas.



Yu laik ol poto bilong yu i  
kamap klia na kala bilong ol  
i lait tru? Putim AGFA film  
insait long kamera bilong yu.

DOLMAR so inap long mekim  
wok bilong tenpela man.  
Yu malolo; em i wok.



**BRECKWOLDT & CO. (NG) PTY. LTD.**

PORT MORESBY · MADANG · RABAU  
LAE · MT. HAGEN · WEWAK · KIETA

# SAVE LONG OL MEMBA



MISTA INUABE EGAIANO  
(Karimui-Nomane Open)

AS PLES: Yuro (Chimbu)

OL KRISMAS: 30

LOTU: Seven De Adventis

SKUL: Em i no bin go long wanpela skul.

WOK: Long 1961, em i wok olsem man bilong tanim tok long hap bilong Karimui Patrol Pos. Em i wok long plantasin bilong Sentral Distrik inap long 3-pela yia olgeta.

FAMILI: Em i marit na i gat 3-pela pikinini.



MISTA PERRY KWAN  
(Kavieng Open)

AS PLES: Kavieng

OL KRISMAS: 35

LOTU: Yunaitet Sios

SKUL: Winim skul bilong em long Queensland long Australia.

WOK: Em i man bilong malenim ol kain kain piksa, na man bilong kisim piksa long kamera. Em i gat wanpela sip bilong em yet. Em i kirapim Yunaitet Politikal Sosaiti na em i presiden bilong Kavieng K.M.T., na O.C.A.

LUKIM PINIS: Planti kantri.



MISTA GALOPO MASA  
(Kandrian-Gloucester Open)

AS PLES: Alaid (W.N.B.)

OL KRISMAS: 37

LOTU: Katolik

SKUL: Pinisim standet 2 tasol long Misin Skul.

WOK: Em i wok olsem leba long Rabaul inap long 3-pela yia. Em i stap Presiden bilong Gloucester Lokal Gavman Kaunsil inap 1 yia, na Vais-Presiden inap long 4-pela yia. Em i memba bilong P en C long Gloucester Skul. Em i wanpela kaunsila na wanpela bisnisman tu.

FAMILI: Em i marit na i gat 4-pela pikinini.



MISTA NENK PASUL  
(Kandep-Porgera Open)

AS PLES: Kumbros (W.H.D.)

OL KRISMAS: 36

LOTU: Luteran

SKUL: I no bin go long wanpela skul.

WOK: Long 1959, em i stap tultul. Na long 1961, i go inap long 1963, em i stap luluai. Long 1967 em i kamap Presiden bilong Kandep Lokal Gavman Kaunsil inap nau.

FAMILI: Em i maritim 6-pela meri na em i gat 11-pela pikinini.

# stori bilong tumbuna

## NAIT I KAM WE?

Bipo tru long taim bilong ol tumbuna, ol i sindaun long san tasol. Na ol i tok i no gat tudak long ol. Na ol i no save slip long nait, nogat. Ol i save sindaun long bikpela san tasol. Na ol i save go kisim kaikai long bus i kam long ples, ol i kaikai i go pinis, na ol i go kisim kaikai gen. Olsem yet.

Na wanpela man i go katim saksak na skirapim wantaim meri bilong em. Na meri bilong em i wasim saksak i stap. Na man bilong em i tokim meri bilong em, yu wasim saksak i stap.

Na man bilong em i go painim ol kapul, ol i save slip long hul bi-

long ston. Em i go painim ol i go go na i no gat tru long em. Na em i no bungim wanpela kapul.

Na em i go bungim wanpela wara i stap antap long kil bilong wanpela diwai ton. Na dispela man em i ting olsem, em wara bilong ol pisin, ol i save kam waswas long em.

Tasol i no wara bikim long ol pisin, nogat. Em i wara bilong san i save kam na waswas long em. Na dispela tumbuna man em i ting, em i wara bilong ol pisin tasol. Na em i wokim haus pisin pinis long dispela ston, na em i go long ples. Na kisim baim nara na ol spia, na i kam bek na em i go insait na i hait i stap insait long dispela haus pisin. Na em i was



i stap.

Na em i was na i lukluk i stap, na em i ting olsem, bai ol pisin i kam na i waswas long dispela wara, bai em i sutim ol. Tasol em i was i, stap na em i lukim san i kam olsem man tru, na em i waswas long dispela wara. Na lapun man i was i stap.


Na man i lukim san i kam waswas long dispela wara, na man i sek nogut tru long san. Orait san i waswas pinis na em i go bek long hap

ples bilong em. Bihain dispela san em i laik kam waswas, na man tru em i sindaun i stap. Na Em i was long em pinis.

San em i laik go daun waswas long dispela wara, na man em i kirap tasol em i sutim em. Na san indai. Na tudak i kamap long olgeta ples. Em tasol, stori bilong san na tudak i bin kamap olsem wanem.

Stori i kam long  
Frans Tetera  
Warapu Aitape.

## WOKABAUT WANTAIM JISAS BUK 2 NAU EM I REDI



WOKABAUT WANTAIM JISAS em i wanpela gutpela buk tru na em i bin kamap long hatwok bilong yumi Papua Niugini yet. Pasto Yanadabing Apo em i wok edita long en. Dispela buk em i bilong helpim olgeta Kristen famili long lotu bilong ol long olgeta de.


Na dispela buk em bai i kamap 4-pela hap inap olsem tri mun tri mun. Olsem na nau dispela em i namba tu hap inap yu stat long Epril i go inap long Jun na bai i pinis.

Yu ken baim dispela buk long dispela tripela buk stua:

### KRISTEN BUK SENTA

- .... P.O. BOX 222 MADANG
- .... P.O. BOX 215 KUNDIAWA
- .... P.O. BOX 718 LAE

Oda No. 121...Prais: 30¢



## Mekim Kot Long Ol Ples Yet

Gavman i laik traime pasin bilong makim ol jas bilong mekim kot insait long ol ples yet. Man i mas kot, em i no mas kamap long bikpels o taun, nogat; ol lokal jas bai skelim tok bilong em.

Ol i ting long makim wanpela wanpela eria i gat planti ples liklik long em na bai ol i makim 3-pela inap 10-pela jas bilong holim kot long ol ples hia. Bai i gat sampela lokal plisman tu i sambai strongim tok bilong ol jas.

Ol jas na kot hia inap long stretim tok long ol pait, ol bagarap, pasin spak, na tok posin. Ol jas hia inap makim mani inap wan handet dola bilong baim kot; na dispela mani i mas go long lokal gavman kaunsil.

Wanpela samting ol jas i no inap kotim: em ol man i brukim lo bilong draiv na bilong rot.

Oltaim i gat kot, 3-pela jas i mas stap; i ken gat moa tu. Em i laik bilong ol jas na kot.


Gavman i laik traime dispela pasin na sapos man i gat tingting o tok, em i ken autim.

# LAS ANZAC DE LONG YUMI

Olgeta D.I.E.S. poto



Kain lain kiap na ofisa i bin helpim Papua Nu Gini long woa. Ol medal bilong ol inap soim yu.




Dispela poto i bilong 13 September 1945 na ol i mekim long Wom, long Wewak. Namba wan bilong ol Japan, Jeneral Hatazo Adachi, i laik givim bagnet bilong em i go long namba wan ofisa bilong ol Australia, Jeneral Robertson. Olsem tasol woa i pinis long Papua Nu Gini.

Em i las taim nau Papua Nu Gini i gat Anzac De. Em i pestode tru bilong Australia na Nu Silan. Bihain yumi gat selp gawman, bai yumi no moa holim ol holide bilong ol narapela kantri.

Anzac De em i oltaim de ol Australia na Nu Silan i save tingim ol soldia bilong ol indai long helpim kantri bilong ol. Hia tu long Papua Nu Gini long Anzac De yumi oltaim go bek na tingim ol manmeri i lus pinis long taim bilong woa.

Long yia 1970 ol i mekim bikpela pesto long Wewak long makim pinis bilong woa, em ol i bin mekim long Moem long 13 September 1945 na ol i bin mekim dispela las beten: "OL SOLDIA INDAI PINIS, OL I NO KEN GO LAPUN, OLSEM YUMI YET I STAP BAI GO LAPUN. OL YIA I KAMAP BIHAIN I NO KEN HEVI LONG OL, I NO KEN DAUNIM OL."

Mipela i tenkyu tru long olgeta man bilong ol narapela kantri i bin pait na dai bilong mipela.



Long woa 2500 plisman, 4000 PIR, na 36,000 ol lokal man i bin helpim ol Australia long winim pait. Ol tu i bin kisim 360 medal tu.

## PASIN BILONG BAIM WANTOK

*Sapos yu stap long skul o long kaunsil o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.*

Hia nau yu raitim :

Nem: .....

Adres : .....

.....

Mi laikim ..... pepa i kam olgeta taim

Salim i kam long :

WANTOK - P.O. BOX 396 - WEWAK

*Sapos yu wanpela yu laik kisim WANTOK i kam long yu stret, orait yu salim dispela tiket i kam:*

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem: .....

Adres: .....

.....

Salim i kam long :

WANTOK - P.O. BOX 396 - WEWAK

## Givim \$2,000 Dola

Lae siti Kaunsil bai givim \$2,000 dola long Milfordhaven klinik.

Kaunsil klak Mista J. Biltris i tok olsem, dispela \$2,000 dola bai i go long dispela klinik, na hap mani bai ol i yusim long wokim haus

bilong etpos odeli bai wok long klinik hia.

Dispela bai mekim isi long husat ol sik pipel i kisim bikpela sik o bagarap i ken go na lukim etpos odeli long taim em i fri long wok.

Em i tok tu olsem, Milfordhaven klinik bai helpim olgeta pipel i

stap long hap bilong Milfordhaven na olgeta pipel wantaim.

## 4-pela Lainim Wok Fama

Kainantu Lokal Gavman Kaunsil long Isten Hailans Distrik bai kirapim wanpela kain skul bilong lainim ol man long wok fama.

Long statim dispela wok, bai wanpela yuropien fama yet i go pas long dispela skul. Man

hia bai lainim ol yangpela man long ples long pasin bilong planim olkain kaikai samting long gaden, pasin bilong salim ol samting long maket, na bai em i skulim ol yangpela man hia tu long wok bilong planim ol kain kain diwai.

Pastaim bai man hia i skulim 4-pela yangpela man tasol. Trening skul hia bai stat long mun Julai long dispela yia. Bai ol i tren inap 8-pela mun.

Taim ol i pinisim trening bilong ol, bai ol i go bek long ples bilong ol na skelim ol man long olgeta kain wok bilong fama.

## Ol Meri Long Kieta Taun

### I Mas Takis Olsem Ol Man

Kieta Lokal Gavman Kaunsil long Bougainville Distrik i tok olsem, sampela meri long taun i mas peim wankain kaunsil takis olsem ol man i save peim.

Insait long wanpela kaunsila miting ol i mekim i no longtaim i go pinis, wanpela kaunsila i bin mosenim olsem: I gat sampela meri long Kieta taun i wok long ol dipatmen bilong Gavman na ol bisnis kampani em i ol i save kisim wankain pe olsem ol man i save kisim. Nem bilong kaunsila hia em; kaunsila Henry Moses.

Kaunsila Henry Moses i tok ol dispela lain meri hia bai peim \$10 dola takis i go long kaunsil olsem ol man i save peim.

Olgeta kaunsila i agri o tok orait pinis long dispela mosen bilong takis.



# KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

## the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea



*Tutt Bryant Pacific Limited*

LAE-MADANG-PORT MORESBY-GOROKA-RABAU-KIETA

Wantok Publications bilong Wewak (P.O. Box 396) i wokim, na Wirui Pres long Wewak i prinim.



d.i.es.

KAUNSI BILONG HELPIM TINGTING BILONG MINISTA BILONG EDUKESAN i bin wok tri mun nau long stretim olkain wari na tok i save kamap long dipatmen bilong edukesen. Yu lukim poto hia, kirap long lephan, na yu ken painim dispela lain ofisa hia i sindaun kibung: Mista Loa Reva, Pat Ila'ava, Geno Roakeina, Kwapena Makare, John Hereman, Ebia Olewale, Vincent Eri, George Obara, Tau Boga, Kini Beoli, Alkan Tololo, Nasson Paulias. I gat 3-pela man moa i no stap long poto: Kwamalo Kalo, na Alan Iso'aimo na Elijah Titus.

15 15	15 1	15 15
15 SERIALIZED RESEARCH LIBRARY SEP 473 00441	15 5	15
15	15 9	15
15 15	15	15 15

# WINIM MAN!

\$5 dola i wet i stap

5 pela man inap winim wan dola wan dola.

Mekim tasol wanem samting mipela i askim daunbilo hia.

Nau salim i kam long

**WANTOK piksa  
Box 396, Wewak**

NEM BILONG YU:.....

ADRES:.....

.....  
.....

Yu mas painim 6-pela narakain namba aninit long 9 na raitim long 6-pela rum i stap nating long bokis. No ken raitim namba i wanakain. Taim yu kamapim namba long 9-pela rum yu mas kisim ansa 15 long 12-pela arere bilong rum na 4-pela kona bilong bokis.

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.